



Sesida dals

16 d'avrigl 2019

Communitgà ils

18 d'avrigl 2019

Protocol nr.

248

Incumbensa Bigliel

concernent la digitalisaziun da las proceduras per la permissiun da construcziun

Resposta da la regenza

Tenor l'incumbensa duai vegnir examinà co che la procedura per la permissiun da construcziun possia vegnir digitalisada uschè ferm sco pussaivel. Uschia duai vegnir reducida la lavur tant per las persunas petentas sco er per l'administraziun. L'incumbensa sa referescha a soluziuns che vegnan examinadas actualmain en ils chantuns Berna e Turgovia.

En il Grischun vegnan inoltradas a las autoritads da construcziun communalas mintga onn tranter 12 000 e 17 000 dumondas per construcziuns entaifer las zonas da construcziun (EEZ). In pèr da questas dumondas EEZ dovran permissiuns supplementaras chantunalas che vegnan concedidas directamain dals posts cumpetents. Tenor la media da blers onns vegnan ultra da quai inoltradas a las autoritads da construcziun communalas var 1200 dumondas da construcziun per construcziuns ordaifer las zonas da construcziun (EOZ). Questas dumondas da construcziun dovran – ultra da la permissiun da construcziun communalas – ina permissiun EOZ dal chantun sco er per regla anc permissiuns supplementaras d'auters uffizis chantunals che vegnan communitgadas en moda coordinada cun las permissiuns EOZ.

Gia en las uras da dumondas da la sessiun da december 2017 e da la sessiun da favrer 2019 è la regenza s'exprimida davart l'introducziun da la procedura electronica per la permissiun da construcziun (ePPC) ed ha punctuà en quest connex che la ePPC furmia ina part integrala da la strategia dad e-government da la regenza e vegnia beneventada correspundentamain. Ina pussaivladad en questa direcziun po er vegnir deducida da l'art. 92 al. 3^{bis} da la lescha davart la planisaziun dal territori per il chantun Grischun ch'è gist vegnì revedì per part.

Però resulta dals connexs e da las cifras preschentadas qua survast ch'il success dal project ePPC dastgass dependar decisivamain da l'acceptanza en las vischnancas. Quai premetta d'ina vart ina tscherta prontezza da las vischnancas da far cumpromiss, per exempel tar il formular per ina dumonda da construcziun. Da l'autra vart dovri interfatschas che funcziunan bain e che pussibiliteschan da barattar las datas senza problems tranter ils differents systems dal chantun e da las vischnancas.

Ina grupp da lavur interna dal chantun ha examinà differentas soluziuns en auters chantuns, tranter auter er las soluziuns dals chantuns Turgovia e Berna. Turgovia lavura cun ina plattafurma da datas centrala che furnescha las communicaziuns e las infurmaziuns als systems attatgads sur ina interfatscha normada (eCH-0211). Cun la soluziun CAMAC ha Berna ina plattafurma ePPC cumpletta che mussa il process da la dumonda da construcziun d'avent da l'inoltraziun sur la procedura da consultaziun fin a la decisiun. Er Berna vegn ad esser sfurzà da metter a disposiziun a las vischnancas en il futur ina interfatscha normada ad autras applicaziuns da l'administraziun da construcziun e betg mo a CAMAC. Tuttas duas soluziuns èn uschia avertas per ils programs per l'administraziun da las construcziuns che vegnan duvrads da las vischnancas. Cun quai correspundan questas soluziuns da princip al giavisch che duai vegnir persequità er en il Grischun.

Las applicaziuns dals chantuns Turgovia e Berna vegnan messas online circa a partir da la mesadad da l'onn 2019. Experientschas praticas en quest connex na datti anc naginas. In element central per il success vegn ad esser la dumonda, quant bain ch'i po vegnir communitgà sur las interfatschas normadas. Per motivs da l'effizienz e per spargnar custs vul la regenza adattar sche pussaivel soluziuns existentas. Pervia da quai vul ella anc spetgar in zic cun sviluppar e cun publitgar in sistem per il Grischun, fin che valurs d'experientscha da Turgovia e da Berna èn avant maun. Percunter pon las lavurs preparatoricas necessarias vegnir prendidas per mauns gia ussa. Sco menziunà en l'ura da dumondas da la sessiun da favrer 2019 existan a Turgovia ed a Berna formulars per ina dumonda da construcziun ch'èn ils medems en tut il chantun. In formular unitar simplifitgass er en il Grischun la digitalisaziun da la procedura per la permissiun da construcziun.

Resguardond il svilup e las experientschas dals chantuns Turgovia e Berna vegn la grupp da lavur interna dal chantun alura ad elavurar ina incumbensa da project concreta per mauns da la regenza.

ePPC vegn ad esser in project da plirs onns cun ina summa d'investiziun da passa 1 milliun francs. In tal project d'informatica vegn integrà en il preventiv sur in credit d'investiziun, uschia ch'il cussegl grond vegn la finala a decider cun il conclus davart il preventiv, sche ePPC duai vegnir introducì en il Grischun u betg.

Sa basond sin questas consideraziuns propona la regenza al cussegl grond d'acceptar questa incumbensa.



En num da la Regenza

Il president:

Dr. Jon Domenic Parolini

Il chancelier:

Daniel Spadin